

栗香三筆

栗香三筆卷七

江陰 金武祥 滌生

乙酉季春監鹽梧州蓋四度西行矣陳象九大令爲
繪鴛江鴻雪圖汪君芙生填買陂塘詞贈行云趁春
風片颿千里綠波剛皺南浦篷窗安穩郵籤緩不比
匆匆行旅吟舊句認歷歷江山都是曾經處新詩漫
與看羶峽峯青牂牁水綠重到嶺西路 離筵畔休
讀文通小賦浮蹤容易萍聚如聞曹務優閒甚一任

栗香三筆

卷七

輕裝來去君記取好點筆新亭且作逋翁語

顧況知新亭鹽

監曰吾欲貌海山中也

未妨小住待荔熟綃紅蒲分釀碧東下

作重午余和詞云笑年年牂牁西上雪鴻猶記前度

生綃畫出征帆遠不盡蒼茫烟樹添別緒況潭水桃

花聽唱銷魂句頻來訪古恰冰井泉香火山雲罨吟

稿待重補嗟行役六載難商去住蒹鱸歸夢無據

蠻荒且喜消氛稜好紀歲時風土橫覽處看形勢天

南鎖鑰三江固徘徊起舞正銅柱銘勳金牌趣召聞

道格干羽時關外大捷方撤兵議和故下闕及之

蒼梧地名最古舜南巡曾否逾嶺姑勿深論梧州虞
帝廟離東郭四里許依山面水屋兩重頗荒落余初
至梧卽詣廟得句云迢遞牂牁幾溯洄南交今值凱
歌回茫茫懷古無窮感獨謁蒼梧舜廟來

白鶴觀在桂江西岸鶴岡下鶴岡一名飛鶴岡名勝
志云南漢太守嘗鑿斷之有雙鶴飛逝故名舊志云
山多松樹白鶴羣集余梧州雜咏有句云遠浦波澄

魚出穴

縣志季秋之月嘉魚出于穴

層霄露冷鶴橫江卽咏此也

觀建於唐開元中中楹祀諸佛像其右有樓有亭俯臨三江頗極高曠之致門首有聯云孤鶴南飛山北向大江東去佛西來

由白鶴觀南行數百步有三界廟其神爲明初馮克利潯之貴縣人也生而好道一日入山逢八人分金與之不受與以敝衲服之歸預知人事常有青蛇隨之自云道通三界有司以其惑眾覆大鋪燔之三日

神色如故時旱甚命之禱雨雨大降治疫疫愈始信
其神後遂祀於水西里 本朝屢著靈應加 封號
余入廟瞻謁中祀神左龕西向爲青龍右龕東向畫
虎像以配之蓋後人附會龍虎之義鄺露赤雅云三
界廟一名青蛇廟陸祚蕃粵西偶記亦載馮眞君廟
小青蛇云神能遣蛇相護余見青蛇一色純綠長二
尺許盤伏左龕同游袁君以箸挑而翫之甚馴土人
云蛇出入多少無定常以雞子祀之云

梧州東郭外大雲山麓有水井唐元次山爲容管經
畧使時所鑿也舊傳銘詞有火山無火水井無冰之
句今銘石久湮志乘具載泉源不竭終古常清唐時
於井之東南建水井寺依山成殿以井爲名此境在
雲水之間所游在城市而外礪度短狃交蔭松杉門
臨方塘雜蒔菱芰入寺由左拾級以升則漫泉亭在
焉亦以漫叟水井而名者也禪關逕入已隔俗塵小
亭翼然猶誌遺愛再上有軒前後各一所以供眺覽

集游譙皆會于此南向古榕叢篠如隱邃谷俯視幽
花異卉自成小園挹巒翠于簷前認塔尖于樹杪品
泉小憩偷半日間訪碣窮搜得古人意亦足暢旅客
之游情稱蠻荒之勝境矣秋日偕徐氏昆仲游此有
詩記之云爲訪唐賢蹟相攜佳客游泉聲從古冷山
色向人秋林缺晨曦逗江空宿潦收登亭思漫叟碑
碣試重搜其二云歸途得幽憩高閣似馮虛覓磴古
苔滑打窗黃葉疏山城開畫境塵世亦仙居潭水明

如鏡何人此坐漁

馮虛閣爲準提禪林前楹其額右有詩云抱城江閣
似馮虛雲淨風閒月到初想箇客來共斗酒南山丙
穴有嘉魚皆前梧州守萬君木舟保所題者也先經
水月宮旋越呂祖祠半郭半郊別開勝境亦仙亦佛
同居一龕游冰井而歸爲適中之地登閣小憩憑欄
曠觀隔江諸山環若屏列夾堤兩水澄如鏡明左爲
淨綠軒蕉隱窗虛花深徑曲文魚五色穿荇藻而逾

妍假山一拳蝕苔蘚而彌潤間情偶寄幽趣爲多蓋
冰井寺曠朗出塵此則清靜絕俗各有其勝未可以
軒輊也

重九日偕蒼梧令顏君及徐氏昆仲至冰井寺登高
余題聯云冰井留銘且喜詩人足千古雲山如畫恰
宜此地作重陽旋集馮虛閣余復用前韻成詩云佳
節又重九炎荒悵宦游幸逢三管靜高唱百蠻秋風
雨尊前合烟雲筆底收壁間題句在酬和韻重搜其

二云身世茫茫感浮雲悟太虛千秋憑俯仰兩鬢漸
蕭疏蒔菜縈歸思黃花憶舊居何當掉頭去蹤跡混
樵漁

蒼梧金石流傳者甚尠唐元結冰井銘僅存銘詞而
石已佚惟城東大雄寺爲古感報寺有南漢銅鐘乾
和十六年吳懷恩造余撫搨數紙款文凡八十七字
字頗秀勁此寺殘毀過半壞壁斷礎魯殿無存枕椰
數十株垂蔭山麓老榕荒蘚濃綠滿院蒲牢一叩猶

聞古音楊海琴觀察題聯云兩度來游古寺斜陽冰
井幾回憑弔秋風廢院銅鐘

梧州當黔鬱桂三江之衝其下有繫龍洲焉翛然塵
外將十里而遙宛在水中爲八景之一江流浮玉海
石沈珠此其亞矣丙戌三月扁舟小泊蠟屐往游古
磴已荒僻不成徑孤亭漸圯聞其無人惟此危碕厯
却未毀時當春暮益感勝游遂乃倚杖呼龍披襟招
鶴唱大江東去萬派爭趨看爽氣西來羣峯環拱爰

爲歌曰浩浩兮牂牁匹四瀆今奠南訛惟斯洲之砥
柱兮願永靜夫蛟鼉歌畢乃鼓棹而去

徐氏昆仲凡九人皆子遠太守之子太守經術詞章
有聞於時其子多能世其家學余與晤於梧州者爲
季同固卿彥皋三人季同名紹桐有炙輠集見贈詩
云文章有神契山水喜人來固卿名紹楨刊有四書
質疑三國志校勘記算學入門諸書和馮虛閣詩云
高閣掛林表登臨若步虛不知秋氣冷祇覺俗塵疏

彥泉名紹枚年十九詩詞已斐然可觀和冰井寺詩
云作客曾經此三年記舊遊寒泉重訪古落木幾經
秋其所詣未可量也

徐季同炙輠詩稿三榕樹歌云蒼龍拔鬚鬚墮地衙
衙化作三榕樹三榕樹老已千年蒼龍掉頭不知處
一株孤立差向前兩株並峙相交連寒枝飛舞剛鐵
屈蒼皮剝蝕頑銅堅陰森十畝俯蔭地嵯峨百尺高
參天天半蒼涼起風雨眼前突兀生雲烟陰晴變幻

在倉卒碧雲翳天射寒日迎面槎枒欲攫人刺手鋒
稜露風骨盤根錯節紛支離凹凸起伏爭詭竒走如
得勢馳怒馬卧若偃息蟠虬螭老幹中空透斜穴孤
根拔地懸半規扣之應手金石響鬼神驚泣霜淒淒
臃腫胡不中繩尺不材容汝大十圍如何交立臨中
衢幸免劫火供樵蘇天生棄物不適用螻蟻作穴鼠
雀居榮枯坐閱時代速羣材用世何其愚君看深山
老松檜時來偶慶風雲會鑿削枝柯作棟樑俯仰隨

人互興替世事茫茫奈若何
酌君杯酒聽我歌
留與野人作嘉蔭
子孫世守長婆娑
夜泊錐容云江上一
峯秀蒼烟數十家
頻年急兵燹何處
問桑麻寒柝催長
夜青燐聚水涯
荒荒山外月還照
客舟斜懷千晦若
云學海波瀾獨老
成賈生年少負時
名文章絢爛期千
古圖史縱橫擁百
城奇論不妨驚世
俗多才真覺動公
卿思君更憶幽居
好秋水空林一片
明

曾搏仙少尉有和冰井寺重陽詩原韻云又屆重陽

日鄉關疊夢游巴江一回首風雨十經秋佳節尊前
過層巒眼底收名山若奇句那復憚窮搜飄風摧落
木節候驗盈虛林缺山爭補天空雁到疏重尋冰井
勝益慕水雲居小艇蘆花際蕭閒擬捕魚曾名輝四
川西陽州人

查初白詩云旣來何苦又思家又云纔卸行裝便憶
歸能說出遠行情況 家君思啖鮮荔且欲觀嶺外
風景乙酉仲夏游粵就養梧州重九日有詩云五千

里外渡輪舟子舍歡迎慰白頭宦海幸逢寰海靜老
年補足少年游牂牁水遠頻洄溯冰井泉香屢唱酬

一路喜聞

寬大詔德洋恩普到遐陬

途中恭讀
允法人和議

詔並發帑振兩
粵水災

行裝纔卸又思鄉嶺嶠秋高未見霜

花木四時開一色兒孫兩地作重陽

留大孫伯
豫家居

風塵

要識官難戀耕讀還愁業漸荒相約游踪剛匝歲海

天如鏡泛歸航

山陰陳孝蘭名陔去春爲余作三筆駢序並寄示近

作二首有句云卽持牛耳登壇晚便畫蛾眉下筆難
是秋歸浙江省試以第一名發解牛耳之語遂成詩
識

壬午道出陽朔曾錄壽陽書院楹聯載二筆爲貴筑
顏君嗣微撰今監鹽梧州適顏君令蒼梧往還頗稔
蓋三年前卽有翰墨緣也旋出示其望眉草堂詩文
集長古縱橫變化烏雲豹歌

塔忠武公馬也

結尾云嗚呼江

左年來苦用兵武昌以下無堅城紛紛駑駘伏櫪下

帖耳垂頭何苟且問誰得似塔侯者無其人并無馬
次韻和王鶴琴辭官云風塵不耐作麤官黃鶴高飛
遠勢盤蕤菜鄉心因賦別梅花天氣正衝寒乞湖賀
監容疏放飲酒淵明善達觀堪笑敎籠自羈絆蕭閒
那得似君安揚州云鯉魚風起柳絲絲正是江潮欲
上時那得漁洋清麗筆虹橋重唱冶春詞五言斷句
云春雨濕芳塍曉來看無迹又云急雨勢欲來風聲
挾樹吼七言贈杜子明云捫蝨談兵懷壯畧聽雞起

舞破愁顏和錢莘民云歌興同谷憐諸妹表讀瀧岡
痛早孤感作云築圃農稀紅穗晚趁墟人少綠蕪深
保定云分陝位隆周太保專征節假漢將軍衙齋夜
卧云黃鱸痛飲傷零落白社聯吟恨別離秋闈分校
云雲路共期酬遠志風簷何敢負初心顏字義宣庚
午貴州省元在籍時上書論時事動中竅要黔事底
定多爲其所逆料云

沈文慤選別裁詩以黔滇天遠無從搜羅爲憾余旣

猶交貴筑顏義宣大令錄其詩復出示其同邑亡友
錢莘民芋巖詩鈔莘民名衡以拔貢作宰中州不數
年卒遺詩一百數十首義宣將梓行之諸葛武侯祠
云抱膝斯人往迢迢烟水深祇今千載下誰作卧龍
吟曠代君臣契平生伊呂心歸耕獨未得斜日柏森
森荊州懷古云東流日夜走江聲不爲登樓感已生
涼月自低曹氏壘春濤猶打呂蒙城霸才終是偏安
局形勝猶關過客情更有小朝廷可惜襄樊坐失恨

難平斷句如君看濟時才自有從容度又云讀書必善用或不失之偏可以想其志趣

去歲夏五月有宋梓儕太守廷樑遠寄詩函略云去歲樑在滇南客有攜粟香隨筆至自章門者樑讀而愛之前月至章門晤李君秀峯語次及君益深嚮往樑雖不工詩而詩友之間固多工詩者因抄寄懷人詩八首送別詩一首以結文字緣云云旋得秀峯書謂宋君雲南晉甯州人以進士需次江西工於詩者

也懷王荏吾司成師云賞音文字三條燭贈別瓊琚
玉字詩懷易懷齋孝廉云分謗累君傷積毀遺愁爲
我集羣賢懷楊侄叔同年云離情滇海深千尺別夢
黔雲莽萬重懷沈意文方伯師云上考署纔歸杖早
離愁積久答書遲送別趙樾村同年歸劍川起句云
笛聲吹破湖天秋鄉心一夜生高樓金颺無那送新
雁雲山萬疊添離愁豪邁跌宕近賢中酷似兩當
許午樓大令時中自蜀寓書言獲覩隨筆并道契闊

書末繫以詩云萬里橋邊萬里船相思載不到君前
暮雲春樹徒惆悵爲寄花溪一幅箋

甲申春仲周涑人直刺星譬自粵北行旋聞其權無
爲州牧乙酉秋以所刊自著傳忠堂古文寄示並以
徽墨宣紙爲贈遠道嘉貺方擬作書報謝卽聞其卒
於任所祥符周氏又弱一个老成凋謝不獨爲知己
悲也

涑翁復寄示酌叔都轉日記三冊云亡弟所著題不

自收拾存此而已余按昀翁東澠詞二卷其弟季貺
太守刻於閩中古近體詩余爲搜輯僅存四十餘首
近復以日記摘錄付梓名曰鷗堂日記庶不負老友
遠寄之意云

鷗堂日記云徐鐵生觀察善爲詩性愛才常若不及
曾於臨城驛見予早歲題壁詩歎其工爲詩記之有
老子平生無此句天涯沿路訪斯人之句並予詩俱
載懷古田舍詩集中予題壁多不署姓氏故觀察終

不知詩爲予作也觀察已矣每念知己之感爲之泣
然云云余按懷古田舍詩乙北集下爲乙巳年作有
發河間府二十里舖憶壁間詩不置七律云壞牆親
拂隔年塵意外相逢眼爲新老子生平無此句江湖
沿路訪斯人

用袁子才句

迷離入夢猶詩境歷碌驅車又

旅塵日日風沙星露裏與君一樣歎勞薪附錄拜夢
生題壁詩云暮烟茅店駐征車滾滾驚埃日易斜詩
壁拂塵鈔賸草歌錢隨例乞間花客愁入夜常依枕

短夢驚寒未到家苦被雙羸催促去又披星露踏風沙

宦游嶺右雄于詩文者以秦文伯觀察爲最嘉應黃
雁賓太守鴻藻與交最久文伯嘗題其退思書屋詩
草云誰識玉龍金馬外有人嚼雪咏梅花又云宦海
誰如我輩豪可想其詩清而興豪矣雁賓先以孝廉
官京曹旋以太守官嶺右今歲晤於梧州見示詩草
送張蔭南同年之官閩中云昔人重內官乃以登仙

擬今人重外官已非昔人比人情自今昔內外無二
理張侯磊落姿其才非百里志在作儒臣始願不及
此我識張侯心行役嗟陟屺微祿爲養親風塵詎得
已不見古毛生捧檄轉色喜將父竟不遑嗟我亦人
子遊祥雲寺云登臨來古寺上界一聲鐘路入山腰
曲雲垂谷口封僧閒都似鶴樹老半成龍長嘯出門
去前溪又幾峯山居秋夜云松影參差覆翠微幽人
向夕閉荆扉板橋霜令客初渡山徑月明僧未歸何

處疏鐘來隱約前林遠火尙依稀此中深趣知誰領
避世眞成太古希春日雜興云滿庭春色爛雲霞小
立東風帽影斜萬種間情拋不得倚欄看遍碧桃花
憶山莊云窗含月影花枝瘦枕繞泉聲客夢涼一榻
孤燈思舊事廿年陳跡付山莊

退思書屋詠古詩亦多余愛其邯鄲絕句云我到邯
鄲不成夢由來得失付天公算來除却神仙外塵世
誰非夢裏人皆妙太守之子公度觀察遵憲前以孝

廉副使日本成日本雜事詩一百五十四首尤見家學云

粵東西爲鄰省宦粵西者以粵東人爲多且多詩人黃雁賓太守外如陳硯泉江鏡河兩大令司徒質莊少尉其最著者也硯泉有壽竹廬詩鈔上灘有感云
歷磔經灘路不平天寒霜冷客長征不堪離別親垂老如此風波我尙行客意勞如秋柳亂鄉心忙與急
流爭年年來往雲中雁嗟爾飢驅萬里情斷句云夜

漏偏于獨客長又云囊錢疏似曉天星其旅況可想
硯泉名展雲鎮平人

江鏡河詩云衣冠束縛百骸拘宦海茫茫著腐儒燕
領虎頭非我相鼠肝蟲臂任人呼不勞卜式勤輸粟
何事齊廷笑濫竽身世詎煩詹尹卜故吾不失卽今
吾司徒貧莊詩云海水羣飛日色昏征南笳鼓動關
門時危獨下卑官淚秋老誰招戰士魂有 詔已傳
徵俊又無家還擬蹈邱園飄零弟妹三巴遠夢裏關

山鞠又繁江名有燦連平人司徒名禕開平人二詩
皆于其自書扇頭見之

蔣筠軒太守兆奎以何子貞太史挽其封翁蔚齋先
生聯截字裝冊出示徵題聯云子舍歡娛飽看芝山
增壽色歸舟安穩忽驚菊徑隕秋風冊中自左文襄
以次題者甚多周昀叔都轉云子貞前輩與先文之
朗山兩兄同舉丙申會試朗兄官吏曹過從甚密道
光癸卯甲辰間譽讀書十間房邸中距廠肆不一里

貞翁每遊廐肆必顧邸齋嘗見翁一手挾書一手持
寒具且行且啗朗兄笑謂翁嶽嵒磊落可笑人大有
晉宋間人風趣至今追憶猶爽爽在心目中不能忘
也翁輓蔚齋先生聯二十二言筠軒太守裝池成冊
以垂將來先生之賢與翁書法之妙炤映衡湘各有
千古豈獨鄉邦生色而已筠軒以名孝廉筮仕越西
學行粹然聲譽甚熾異日本庭訓以飾吏治施于有
政用貽令名亦惟根此不忘其親之心以推暨之其

爲孝不益大乎

許月樵學博有游城東諸寺詩云踏遍溪橋路幾彎
又從花底扣禪關寒塘細雨三分水斜日春城一角
山尙有樹知前代事更無人有老僧間尋詩倘遇雲
林社先哲風流不可攀

城東有雲林詩社
鄧方舟先生建

次聯城東

景物如繪余復愛其五言心字兩聯云送客出門去
扶筇生遠心西風吹落木葉葉動秋心皆妙許名懿
林甲辰舉人梧州宿儒卒未十年也

許君同時同邑有施香海明經名彰文咸豐七年殉
難其弟子以衣冠招魂葬於準提禪林之麓事詳邑
乘平生敦尚氣節篤好風雅所居濱江可眺蘇山因
築挹蘇樓觴詠其上刻挹蘇樓同人詩鈔遺詩三卷
七古頗豪放五言云柳底掩柴關浮生祇愛閒幽居
宜傍水秋夢不離山得句憐詩瘦爭棋笑客頑久忘
恩與怨黃雀莫銜環七言云戍鼓聲催落月黃滿天
寒色滿篷霜舟隨鳬雁歸前浦人與琴書共一牀平

野烟消甘蔗潤疏林風度早梅香
慈親昨夜思游子
遙識燈前語夜長
喜猺匪投誠云馬前泥首亦何因
誠信由來易感人
走險偶然爲劇盜
荷鋤依舊作良民
天心止欲誅張角
民意惟思借寇恂
寄語千秋爲吏者
虎狼雖暴豈難馴
斷句如江光搖塔影
人語雜灘聲
殘虹收霽雨
獨鶴破江烟
吟懷孤似月
秋夢冷于雲
思入青山詩有骨
行隨流水客無心
隔林燈閃村厖吠
半夜潮生水鳥呼
雲迷洞壑晝疑暝
雨過陂

塘夏亦秋皆佳句也

藤縣蘇琴舫舍人名時學嘗選施香海及王介臣詩
各二卷合刻之介臣名國賓德慶州諸生送友之燕
京云木葉下牂牁蕭蕭擊筑歌送君之易水爲我弔
荆軻屠狗英雄盡盧龍古塞多山川空滿目歲暮感
如何斷句如夜涼知有雨色淡已如秋小閣燕如新
客至殘春花似故人疏皆佳

赤雅論粵西左右江云按地形左宜爲右右宜爲左

夫粵處南陬之西者皆從東粵或下灘水溯流逆上從溯流者分左右不從地形分左右也

梧州督銷臨全十五埠大江四十二埠粵西全省引地已居八九矣粵人所謂埠卽商人所開之鹽館畧如兩淮之所謂岸也考埠字正字通云同步船舶埠頭通雅云埠頭水瀕也又籠貨物積販商泊之所水經注贛水逕王步步側有城蓋齊王之渚步也述異記吳中有瓜步魚步龜步湘中有靈妃步柳宗元

鐵爐步記江之滸凡可步而上下者曰步青箱雜記
嶺南謂水津爲步有簪步卽漁者施簪處有船步卽
人渡船處通俗編云俗謂問渡處曰埠頭據諸書當
作步字而宋史皆從俗作埠度宗紀有武陽埠熊本
傳有銅佛埠劉錡傳有黃連埠趙淮傳有銀樹埠宋
以前未見用之

光緒甲申粵中海防戒嚴築礮臺塞海口乙酉夏西
潦爲災西關水深數尺因與汪君芙生有廣州西關

築城議擬屬藁而未果因誌其大畧於此以俟後之君子採擇焉廣州內城爲明洪武十三年連三城闢而廣之今謂之舊城其外城則新建於嘉靖四十二年是爲新城 國朝撫綏嶺表以舊城之西半居駐防旗營而紳民之居西關者日就繁庶甲於新舊二城西城之西臨洋人沙基西南近白鷺潭水最深廣洋舶巨艦由西路而來者多泊於此一旦海疆有警黃浦南石頭攔阻不及兵臨城下飛礮所及西關首

當其衝倉猝防禦一無所恃將若之何計惟於無事之時增建西關外城復於城之西南隅築礮臺以輔海防之不足而已其增建西關外城請自新城太平門之南接築循珠江至沙涌折而北至街尾折而東接舊城西北角而止

基址應如何曲折民居應如何拆讓俟官紳會勘時再行繪圖

核辦

城濠南面臨江西面則由沙涌而北本有水道浚

而廣之惟北面須接鑿若干丈其礮臺之設城西本有西甯西關永清三臺已廢今擬於城之西南隅設

礮臺三座如甕城然與城相爲輔翼白鷺潭有敵船
卽可緊對轟擊則敵船勢必受創不能久泊此增築
西城及附建礮臺之大要也而西城之建其利尙有
二尋常盜賊之警有城啟閉較之柵欄其慎固不翅
倍屣盜賊不敢覬覦市廛益形安堵其利一也西關
地勢窪下西潦漲發卽成澤國今歲民尤苦之今旣
築城則遇水漲之時於城門設版堵禦旬日水退復
啟勝堤壩捍水之功無沈竈產龜之慮其利二也尋

常尙有此二利況會城瀕海倘遇洋艘進口則得此
外城與礮臺大足輔海防所不及金湯之固百世永
賴及此未撤防勇藉以助役勤勤被水災黎亦可以
工代振事半功倍正值其時至東關亦應一律增建
東城剏立礮臺以防東路於形勢亦較利便

西潦爲災肇慶首當其衝齧城壞廬諸圍隄尤易潰
決蓋由羚羊峽束縛宣洩不暢耳城外之水平時亦
滌洄湍急往來舟楫寄泊者偶遇風浪便易覆溺商

旅尤患苦之癸未年肇羅觀察勞君泊此夜半風起
覆舟此近事也竊謂水勢宜分分則順軌肇慶城上
游數里本可分流繞城北穿景福園出羚羊之背而
合大江似有故道計分流約三四十里城北瀝湖在
星巖之南地本澤國因勢利導易於爲功一旦分流
實有二利水得分洩隄易保全一也江水別出舟行
有避風躲水之所商旅稱便二也惟開鑿時民田廬
舍多所遷徙此則大利所在不恤小害在當事之臨

時審慎未可因噎以廢食也

廣東新語云肇慶江干多石磯古無泊船之所或謂東門外里許有躍龍橋其下水竇兩重爲崧臺石室一帶山水之所從出如徙此竇深入三四里許渚水成灣可泊大小船數百免風濤不測之患且於本城下關甚利竇旁居人稀少田疇不多官買之築堤約費數千金而已此似可行云云余按此第爲泊船之所不如由上流城西疏鑿繞城北越羚峽之背而後

合於江不獨泊船有所且可避峽流之險尤貴分殺
西潦宣洩較速也

黎二樵端州詩有云牂牁西極如綫來至此擘地風
濤開羚羊咽吭不肯一吸盡呃逆倒壅屯雲雷山巖
水猛雨不下地弱往往蒙厥災此可見肇慶水災之
烈矣

廣東新語云新興河頭有渠形在林阜中若疏鑿使
水南行三十里直接陽春黃泥灣可以通高雷廉三

郡舟楫免牛車挽運之苦亦數郡之利陽春鄧元光
端州小紀云嘉慶間大府欲興水利屢委員勘視均
報不能行道光九年制軍李撫軍盧復委肇羅道許
署肇慶府金親行履勘自河頭至黃泥灣陸路五十
里中多岡嶺村落田園邱墓且天堂墟地勢高亢水
源微細疏鑿難施云云余二筆謂此河若開且可殺
西江水患而所載履勘公牘礙難疏鑿情形較爲詳
備許金履勘在道光九年爲時不遠其公牘當尙在

也

乙酉粵西李中丞奏報桂林水災云五月初一日大雨如注通宵達旦山水同時漲發初二日自寅至辰河水陡長二丈有餘勢極洶湧維時城外樓居民人先見青氣旋變白氣後變黑氣水卽隨之而至聞係上游發蛟近河民房多被沖倒東洲一帶尤甚

秦文伯觀察和余大水歌原韻有序云西粵多山田全賴天雨灌溉又灘江灘多水淺非積雨水不能濟

舟楫故民俗不患雨多但患雨少太平之世十日一雨此間如十日始雨則呼旱矣去歲十月陰雨至今每晴無三日而農民無苦若在他省已成澤國四月初一日大雨河水洶湧東門浮橋斷纜漂散舟楫多覆溺而民居無恙也五月初二日雨連宵達旦亦無風雷清晨尙課孝廉書院或言水已入城亟登城四望民居多不見水高二丈有餘蓋大榕江一帶起蛟士人見之其形如牛就地一滾水與天連真奇災也

陳文恭公有伐蛟說其地冬雪不存夏苗不長鳥雀不集然在西北平坦之地乃可防範粵西深山大壑人跡罕到不能遵法行之天災流行乃天意也積德回天或有濟乎其詩起句云三日不雨民呼旱石多水少憐灘江客冬至今年久晴旭罕見陰霾長蓋紀實也

余大水歌起句云神禹疏鑿所不到五嶺以外惟粵江上通黔滇遠入海不數四瀆源流長惜無洞庭彭

蠡大澤使渟滯但見三江左右合注同披猖蓋粵西
羣山東逼水建瓴而下無可渟滯故陡起陡落爲患
較速耳

梧州爲三江總匯水勢易長余所居爲南城外高阜
處五月初水漸長及門入院落端午晚遂樓居初十
日水始定樓下水深三尺有五寸蓋數十年未有此
大水云

梧州之北爲府江卽灘水也灘水發源于海陽山與

湘水同源而南北分流故名湘灘卽相離之義灘水南流至梧州約千餘里水獨澄碧與黔鬱合處清濁判然不混故城西之水稱鴛鴦江所謂花船妓艇者多泊于此有珠江之風焉余昔過梧州有竹枝詞云愛向鴛鴦江上住怕從此去說相離因斷句未存稿附記于此

餘墨偶談云蒼梧府江凡邑令丞尉下車之始皆出硃票嚴查日十禁俗則訛爲十錦矣禁票之外則有

免單數十張獲此者乃無查點之擾然不過百中免
一姊妹行得此者爲光榮焉美其名曰風流帖子有
幕客戲作乞風流帖子詩云珍重恍如書鐵券護持
休羨擁銀旛莫遣美人思贈綺從知仙吏喜栽花凡
四律不備錄

自梧州至肇慶產嘉魚肇慶多在羚峽梧州多在火
山火山有丙穴魚藏其中食乳泉喜寒畏熱以八月
出春暖則無狀畧如吾鄉鱗魚而小其多刺又畧如

吾鄉魴魚肉嫩脂肥烹食鮮美余在梧州幾于頓頓食之較之鱔魚魴魚又別有一種風味也

詩南有嘉魚正義云南方魚之善者莫善于江漢之間特概言之耳左思蜀都賦嘉魚出于丙穴注云丙穴在漢中沔陽縣北有魚穴二所常以三月取之丙地名也正字通謂卽鮓魚出漢河丙穴中杜甫詩魚知丙穴由來美卽此或云魚以丙日出穴益都方物畧曰嘉魚出興州大丙小丙山石穴中今雅州亦有

之方輿覽勝曰丙穴在巴郡明通縣井峽中其穴凡
十中產嘉魚其出也止于巴渠龍脊灘首有黑點謂
照映星象相感而成身長細鱗肉白如玉其味自鹹
蓋食鹽泉也埤雅廣要曰嘉魚食乳泉出丙穴穴口
向丙故曰丙也本草綱目云蜀人呼嘉魚爲拙魚蜀
中丙穴甚多丙穴之說不一此皆言蜀之嘉魚耳

桂海虞衡志云嘉魚狀似小鮒味腴美人以爲鮓餉
遠嶺表錄異云嘉魚形如鱒出梧州戎城縣

卽今江
戎墟

水口甚肥美每炙以芭蕉隔火蓋慮脂滴火滅耳嶺
外代答云火山下有丙穴嘉魚出焉置魚乾釜少焉
膏溶自然煎熬謂之自裹又府志云嘉魚作松子香
眾魚莫比此則言梧州之嘉魚也廣東通志言產肇
慶頭如鼠其鱗炙之明如珠蓋兩粵均有之余謂詩
詠嘉魚則概言魚之美與此無涉蜀之嘉魚以三月
出穴十月入穴粵則八月出穴二月入穴其形與味
亦不知相似與否特兩地人以其美故均以嘉魚目

之而兩粵志俱言左思蜀都賦嘉魚出于丙穴卽此則不免附會強合耳

魴魚出于春鰣魚出于夏梧州亦有之魴魚省府縣志皆不載土名鳳尾魚紅腮銀鱗惟大不及尺鰣魚土名三黎魚土音黎曰來志云本產于海出梧江者色味絕佳余按魴魚鰣魚以產揚子江爲最美此間產者大同而小異以吾鄉烹飪之法治之乃佳遠在蠻荒而得嘗鄉味洵足珍也

余舊有陽春黃灣句云巖暖猿搜花釀酒林深貍攬
果爲糧此二景粵西多有之平梧山中猿酒屢見載
籍果子狸梧州秋冬間尤多每購以晏客稱佳品
梧州又有嚶狸似貓能自爲雌雄其香如麝土名不
求人食之令人不妬列子云亶爰之獸自孕而生曰
類異物志云靈狸一體自爲陰陽本草載靈貓一名
靈狸一名類卽此是也

梧州又有狗魚

青黑色無鱗巨首平額大口細目能
四足五指身長而扁尾側如鰭

升木食果冬暖卧樹負暄涎出黏身遂爲人所獲食之補陰本草鮓魚似鮎有四足能上樹俗云鮎魚上竿卽此蜀人名鮓秦人名鮓豈粵人名狗魚乎

池北偶談卷十四云元人竹枝詞云黃魚上得青松樹阿儂始是棄耶時然本草陶注鰻鱧魚能緣樹食藤花雜俎鮓魚能上樹贊曰有足若鮓大首長尾其啼如嬰緣木弗墜宋祁方物畧曰鮓魚出西山溪谷及雅江狀似鮓有足能緣木

黃麋梧州山中多有之其皮作履舄勝於諸皮其肉
與鹿無異余時購食之字彙麋同麇本草云大者曰
麋小者曰麇山海經云女几之山多麋麇卽此方輿
勝覽云梧州火山有獸名靈麋生三足郡中有災及
使車將至則先鳴故麋以靈名云

桂蠹形如蟬可作甘鹹二味楚詞桂蠹不知所淹留
兮漢書趙佗報文帝書有桂蠹一器均載前筆前歲
廣西徐小山中丞自越南營次書來寄贈桂蠹余謝

啟略云浣來薇露如邀華袞之榮悟到樛香幸食神
仙之字快嘗異味永泐愚忱伏惟中丞勳定蠻荒爭
消蠶食安邊偉畧草木亦識威名博學多能蠶魚足
資政證間搜異產分惠羣僚使到佗城數漢書之故
實偶吟騷句愧海國之淹留某蓼苦頻嘗粟香白署
命宮磨蝎一官悟嚼蠟之非結習雕蟲半世等枯蠶
之照云云陳君孝蘭所代作也

梧潭雜佩云桂蠹南越傳尉佗獻一器師古曰此蟲

食桂味辛蜜漬食之今潯志物產載之問之土人無
知者大業拾遺錄云隋時始安獻桂蠹四瓶以蜜漬
之紫色辛香有味啖之去痰飲之疾桂平縣志云桂
蠹今難得

昔年在里以桂蠹令兒子屬對答以蔗蟬一名蔗蟲
出閩中仁和家雨叔侍郎詩云高情戀風露小劫墮
熬煎卽詠蔗蟬也

余梧州卽事句云榕古每連理桑柔多寄生蒼梧縣

署有兩榕根節如虬龍枝柯盤結蔭逾十畝梧潯雜
佩云五嶺以南無霜雪最宜樹樹上多寄生卽山海
經所謂寓木也而桑寄生以入藥名獨著梧之長洲
饒有之採時須令并桑枝摘取不爾卽雜以他木莫
可辨

寶應朱舅伯觀察言其伯祖文定公士彥厯掌文衡
有人倫鑒戊戌會試是爲第三次總裁榜發新貢士
來謁曾文正與焉文正榜名子城文定特異之謂之

曰子必爲 國家柱石惟子名引 見時恐難膺館

選我 朝非翰林出身不能早躋顯秩大展經綸盍
更名乎文正請之文定遂取爲國藩輔之義囑更名
國藩文正旋以三甲進士得庶吉士時文定友人秦
郵薛雲侯茂才函詢得士以何爲最文定覆書有曾
某乃非常之士等語文定旋卽謝世而文正更名之
由本傳年譜多未載文定子孫亦無知之者觀察蓋
聞之李合肥傳相也傳相尊人亦戊戌進士官刑部

郎中記名御史傅相云趨庭之際夙聞此語嗣入文
正幕府備詢其詳先輩觀人自有鉅眼究不知文正
原名何以未宜耳

彭南屏太守寄贈其祖詠莪相國蘊章文敬公詩文
全集歸樸庵叢稿十六卷松風閣詩鈔二十六卷相
國邃於古學尤工樂府張南山先生藝談錄載其句
云碧月破天出白雲隨地生又云但於世所趨嗜之
宜淡泊所謂身在寰中心超塵外也

貴筑石雨農太守贈其尊人襄臣侍郎贊清飭餽吟
十二卷集唐句一千首排比聯絡幾如無縫天衣當
與黃唐堂中允香屑集並傳自著詩無刻本僅於

國朝正雅集中見數首車中感夢云車輪東去夢西
歸黃葉村中款故扉三徑就荒松菊瘦千畦無恙稻
梁肥鄉音入耳聽來慣仕路回頭悟已非苦是華胥
難久住風塵滿目又斜暉錄之亦見一斑

定遠凌仲鸞刺史兆熊出示其祖謙齋先生啖芋齋

詩稿先生名泰交乙丑進士作令燕趙擢守鎮遠道
光間入祀名宦蓋循吏而詩人也卷端有孫淵如程
春海諸先生題識詩宗王孟抒寫性靈晦日欲雪寄
兩弟云日夕雲陰重寒鴉噪滿城客心驚歲晚天意
逼愁生大被經年夢殘燈午夜情關山正蕭瑟風急
斷鴻聲過天門晚泊姑孰云秋水浩無際曉烟橫遠
村長風來碧落一葉下天門浪湧魚龍氣山留斧鑿
痕落帆何處宿姑孰又黃昏斷句如不飲愛沽酒耽

吟懶賦詩人家秋水曲漁網夕陽天妙想結清境長
吟生遠心久別乍逢渾似夢舊遊重到豈無緣好景
慣從忙裏過天機時向靜中生一片白雲留客住半
林黃葉得秋多皆清微淡遠直追盛唐

于晦若主政由天津回桂林道出蒼梧偕徐氏昆仲
過談至三鼓始別晦若於甲申至蜀遇王壬秋易賓
甫各有投贈錄示七古各一首王詩樸老易詩豪宕
于詩亦如驂之靳篇長不備載王詩云廿年和戰憂

危議只與世人生富貴賈胡小豎那足憂一和一戰
皆吾利易詩云高樓大道浮雲驟執手相看各驚瘦
已異容顏數載前休論事業千秋後于詩云人生何
者爲去就南海北海隨風行又云魯連不肯入東海
更欲北走燕昭臺時晦若將由蜀至燕也

栗香三筆卷八

江陰 金武祥 蒞生

鬱江自梧州以上水中多洲如謁洲登洲青草洲思
禮洲黃婆洲皆有田園廬舍而長洲綿亘二十餘里
林木葱鬱居民尤繁爲蒼梧西境桑寄生卽產于此
江中復多灘礫硿錯立激雪奔雷土人聚灘石築爲
壘高者如塔廣者如壩爲絕流網魚之計凡百餘里
不絕故西江之水宣洩不暢復無停瀦之所每爲患

較速耳

舟行入潯州境自白馬以上皆平曠無山宜於種植沿江一帶墟市繁而田畝廣較之昔沂桂江層巒疊嶂人烟稀少者風景迥異矣

桂林之山突起峭拔故奇秀甲天下今自梧溯鬱江而行岡嶺逶迤大率土山橫衍自藤以上厯平南桂平兩岸田疇夷曠及至貴縣城乃見鬱江以南蒼翠矗立如龍如獅如龜如螺如垣墉如囷廩如卓筆如

浮圖如蓮之初開如筍之特起奇形詭狀遠近錯峙
凡二十四峰而就中巖洞最奇者前有寺曰南山寺
渡鬱水陸行不十里至寺門修竹古榕濃綠交映入
寺至巖深廣逾九楹前覆以屋神像環立有元時御
書南山寺碑其上鐫石佛頗莊嚴後有飛來鐘款識
多梵字繡蝕不可辨巖旁有磴道曲折數百級有鯉
魚巖再上則宜仙洞以徑險未往巖右復有巖巖乳
下垂名仙人掌珠滴不絕頂有洞小如甕中接以梯

東坡志林 卷八
余猥升而上石級數折極狹纔通人越石門豁然開
朗爲玉皇殿俯視平原頗曠心目此巖此洞洵稱奇
異巖口有不老松長僅尺餘松鍼綴小黃珠花似松
非松他處所無又有菩提樹惟粵東訶林及此有之
亦草木之可紀者

桂林山水以巖洞勝余聞句漏洞尤勝蓋二十二洞
天福地也丙戌十二月于役過北流始往遊焉出縣
城東北行卽見瑤簪玉笋如在陽朔道中約十里至

句漏洞額曰句漏洞天洞之上又有篆書雲關二大字前有小亭少憩四顧則列岫迴環如眾星之拱北辰而中開平野畦畛繡錯數里數洞不煩登陟是洞爲主又名寶圭洞有石室三正室祀葛仙像卽晉葛洪求爲句漏令在寶圭洞修煉成仙者也然廣州志以爲葛洪化於羅浮蘇子瞻以爲化於廉州其說不一善乎前令安九埏記云抱朴採煉丹砂乃有託之言與留侯之從赤松皆爲見幾而作當晉之世中原

多故遂遠求句漏耳晉有陶潛人高其隱洪亦晉之
隱君子也此論名通不必深考洪之煉丹于此否矣
余先至洞右則繚曲虛明略如端州之星巖而高廣
過之有龕祀仙配鮑潛光夫人惜廊廡日就傾圯無
葺而新之者旋至洞左秉炬而入宏邃晶瑩如入玉
京紫府石牀丹竈仙蹟猶存其肖物之奇與栖霞洞
相似曲折約半里許下有池久旱水涸遂止于此遠
見池之頂有光蓋有穴上通山頂也此洞獻巧炫異

無物不有已具見宋吳元美十洞記中十洞則寶圭而外以白沙洞爲最余遂出寶圭而訪白沙北行里許卽至洞在山腰額曰白沙洞荆榛瓦礫似先有亭宇而後毀者余鼓勇而入石膏玉英別擅佳妙惜無有人引而遍探未能窮厯元美所紀之勝或留有餘以俟續游乎方輿勝覽云以其多句曲而穿漏故名句漏余謂此山引人入勝句留忘返句留與句漏同音可爲此山之名別具一解也

容縣卽古容筦城外有經略臺爲唐經略使元結所
建臺據高阜三面臨江頗饒勝槩遙望都嶠山八疊
迴環蒼翠撲人眉宇攷都嶠爲第二十洞天相傳葛
洪在句漏鍊丹常往來于此東坡送邵道士歸都嶠
洞天詩云乞得紛紛擾擾身結茅都嶠與仙鄰讀之
益深神往

潯州桂平縣西北五十里有紫荊山爲咸豐時洪楊
倡亂之所余過潯州閱郡志載紫荊事略爰摘錄之

其略云髮賊洪秀全者廣東花縣人粵匪之尤黠者也挾其邪術與逆黨馮雲山陰畜異志徧覽形勢踞紫荆之金田村爲巢穴紫荆者層崖疊嶂深林密箐周圍百餘里通斷藤峽前明王韓兩公勦侯賊處也附近有土地祠素著靈異洪逆因毀其像告鄉人曰人當敬天地奉上帝木雕泥塑皆妖魔所僞託不足敬也於是楊秀清陳玉書蕭朝貴韋正石達開等翕然附之廣布邪術焚香拜斗而上帝會之名目煽惑

鄉閭愚無知者紛紛從賊矣團練擒馮逆至城知府
顧元凱知縣王烈訊之得其妖書內載敬天地戒淫
慾諸款以其類於勸善無叛逆事也釋之遣解回籍
雲山途逸去復至金田勢更猖獗時流賊蠭起四境
騷然動以千百計而官與團吸吸有不能終日之勢
雖知其事不可已猶幸其事尙未起苟且一日或可
以卸責而免咎賊亦逆窺此意遂白晝探丸肆無所
忌而黨愈眾矣凡拜上帝會則必家屬子女俱產業

賊售或問其故則曰我太守也我將軍也豈汝輩耕
田分耶其妻妾亦笑謂戚鄰曰我夫人也我恭人也
豈汝輩村婦女耶其狂誕如此賊最重食犬每戰捷
則以大肉饗諸賊首戴紅巾旗則或紅或黃或五人
或十人爲一隊五人者斃四人其一人猶賈勇衝敵
不知退其敎以死爲登仙也調遣不足以婦女充後
隊蔡村之戰賊不過千人攻永安二千餘人攻省城
六七千人不至萬也過湖後脅從始眾動以數萬計

初所陷如大黃江太平墟永安州全州等處官軍與之戰輒曰行將取江南矣豈畏爾官軍耶及永安之走攻省垣也蠶叢鳥道素無人跡而縋幽鑿險扳藤捫葛夤夜走百餘里欲行襲取之詐官軍追勦復爲賊伏所傷跡其所過山川形勢進止伏動倉卒間皆若素定其逆謀殆非一朝夕矣復得邪術佐之而飢寒逼迫之民羣爲之用而樂於死豈非數哉

灘江有三百六十灘鬱江之灘則以橫州之大灘爲

最險綿長三十餘里一名起敬灘一名將軍灘卽漢
烏滸蠻地故又名烏蠻灘上有馬伏波廟頗著靈爽
余入廟題詩云飛鳶跼跼竟生還功業雲臺伯仲間
尙有餘威傳浪泊長留靈蹟鎮烏蠻江流東去三千
里地勢南連十萬山十萬大山爲兩粵
及越南交界處太息炎荒一
銅柱茗蕘未許後人攀

伏波廟聯額林立壁間有阮雲臺宮保詩蓋嘉慶二
十四年閱兵過此所題也詩云鬱水貫烏蠻樓船舊

此間伏波橫海去合浦獲徵還人拜磯頭廟灘喧水

底山篙師能撥險潑刺出江灣又有張月卿中丞題

七律詩內有句云兩朝爵里憑人考

漢有兩伏波將軍一爲邳離路

侯一爲新息馬侯而

百粵烽烟自古多

下句尤確

橫州鬱江之南有寶華山一名南山俗以明建文帝

蒙難于此又名難山余渡江而行約十餘里抵山麓

樹色葱蒨情形如翠屏行林陰而上石磴數百級入門

見橫額曰萬山第一傳爲建文御書志稱建文雲游

寓此十四年人不之識今寺右有龍隱殿供建文遺
像旁侍鹿虎二仙又志載建文詩云風塵一日忽南
侵天命潛移四海心鳳返丹山紅日遠龍歸滄海碧
雲深紫微有象星還拱玉漏無聲水自沈遙想禁城
今夜月六宮猶望翠華臨其二云閱罷楞嚴磬懶敲
笑看黃屋寄曇標南來瘴嶺千層迴北望天門萬里
遙款段久忘飛鳳輦袈裟新換袞龍袍百官此日知
何處惟有羣鳥早晚朝謂卽在此山時所作他書又

以爲在貴州金竺長官司題壁云

博白縣綠蘿村爲梁綠珠故里城外雙角山及綠珠
江綠珠井皆其遺跡余小住博白有詩云蛾眉貽禍
忍重論獨向樓頭報主恩一樣美人生長處綠蘿村
勝苧蘿村

余由博白至容縣有句云愛向炎荒尋勝蹟楊妃古
井綠珠江蓋容縣爲楊妃故里名勝志云楊山在容
縣西凌雲里唐楊貴妃產于此有井尙存曰楊妃井

如小名玉環父亡母葉氏懷孕十三月而生後軍都
督部署楊康以財帛求之爲女三歲聽康親女讀書
卽能成誦時長史楊元炎攝行帥聞之遂倍金帛與
康得之選入壽王宮明王召入宮爲貴妃號曰大真
商寶意太守盤質園詩集有容縣楊妃井歌云范陽
鼙鼓邊塵起雨濕梨花葬妃子楊氏當年掌上珍生
長容州普甯里戚畹銷亡慙劫沙行人猶自訪楊家
傾城麗質歸宮禁隔代遺蹤汲井華兄姊一門皆列

戟宅旁方蟄寒流碧真同禍水蓄昭陽幾見恩波沾
太液冷落延秋啼夜烏倉皇萬乘赴成都金餅百味
君王薦怕聽深宵響轆轤臨春張孔顏如玉胭脂血
淚南朝辱此井炎雲瘴霧中古波不動蝦蟆伏君不
見梁家鬻女珠盈斛墜樓不惜埋金谷一勺泉留雙
角山萋萋蠻草含情綠

丁亥上巳偕同人至冰井寺小集陳象九大令爲繪
冰泉脩禊圖余復用登高舊韻成詩云風塵慚久役

山水愛清游脩禊逢三月登高憶九秋幽情觴詠暢
好景畫圖收髣髴蘭亭盛何勞軼事搜曲磴連雲迴
空亭枕水虛鶯花何旖旎松竹自清疏訪古懷循蹟
偷閒羨隱居形骸聊放浪一笑謝筌漁余自前歲游
冰井寺唱和詩凡數十首後來用韻者賡續成帙名
曰冰泉唱和集將付梓以廣其傳云

是夏六月張丹叔廉訪赴任桂林道出梧州亦觴之
於冰井寺和詩云萬山圍一寺片石重千秋如何王

事迫轉與故人疏又卽席成七律詩有云雲氣黑垂
經閣外山光青到酒杯前皆可爲冰井寺故實也

冰井寺唱和詩營山郭鶴臬二尹亦投和作旣復以
其世父薇生先生毗渚詩稿二卷見示先生以大挑
官粵西厯任州縣至守慶遠均有政聲先有秦文伯
觀察序云先生之詩不假雕琢自寫襟抱蓋多清超
瀟灑之作云云然余觀集中居庸關詩云風雪居庸
路天寒不易行羣峯蒼翠合一色冷雲平地勢吞蒙

古山形擁帝京壯懷殊未減策馬望春明紫荆關云
烟波淥水闊風雨紫荆秋雁門關云飛沙連漠北疊
嶂走雲中皆雄渾蒼健風格在中盛唐之間

謝方山駕部出示其尊人蓮士太守蓮潔詩存並篋
外錄南征日記太守諱膺籍隸吾邑久官粵西頗著
循績今方山昆仲猶寓桂林也別弟詩云別弟悲分
手斜陽照水亭一聲孤棹響兩岸暮山青風急浮鷗
起雲迷落雁停淒然歸旅舍明月滿中庭雜感云面

熱猶如火心清本似冰但知余不負莫問客何能白
鷺誠堪愛蒼蠅信可憎古人藏利器磨淬養鋒稜

華氏爲無錫望族伯喬觀察本松筮仕粵西久於幕
府前在濟甯徐中丞許見余隨筆介陳礪莊太守索
寄近刻後遂郵贈七律詩云元龍湖海知名久庾信
文章托興深三管留題驚綵筆一編遠寄抵兼金時
艱每動聞雞感詩健終存躍馬心却悵投荒已衰落
敢云笙磬本同音余和韻詩云紀功碑重昌黎筆憂

國詩傳杜老心蓋觀察復寄示寄巢遊草二冊多
感慨時事之作其龍州秋感云狂飈撼木氣蕭森秋
到邊庭感慨深遠服幾人能控制高樓有客倦登臨
文章不乏探驪手部曲猶存搏虎心聞道 朝廷籌
守備長城萬里孰堪任驟添新漲綠侵牆欲濟還憑
一葦航東去大江流日夜秋來天氣判炎涼威名誰
負當關寄樂府重翻出塞章莫向天孫頻乞巧枉拋
金綫織雲裳羣山環繞路迂迴青草黃茅瘴不開何

處捷音非露布幾時圖畫及雲臺將星忽報中宵落
我馬誰憐絕域隕今日補牢猶未晚籌邊端賴范韓
才十年四度客遐陬愁對雙溪水急流孟博何堪容
畫諾泉明祇合賦歸休倖成漫詔軍聲壯偏處終貽
軒卧憂一夕西風蕭瑟甚天涯淪落又中秋

寄巢草又有遣興六首附錄向子振太守和詩皆工
力悉敵子振詩有云碧觴山花狐拜月赤牙陰莽蝮
游風語多詭譎子振近曾以所刻王定甫通政龍壁

山房文集五卷見贈未見其詩稿也

粵西宦途工詩者如江鏡河陳彥皋兩大令皆於去

歲過梧來訪今夏貴筑陶紫庭別駕樽亦過此以所

著北征紀行集二卷見贈蓋丙子歲入都征程日記

而詩亦附見焉諸體多清渾五律尤勝虎門云雲水

萬重昏扁舟出虎門百川歸鎖鑰一氣盪乾坤浪靜

神龍伏山迴怒馬奔披衣看海日江漢不須論楊村

早發云行過河西地烟開曙色寒朔風吹大野曉日

上征鞍古驛黃塵輒荒田白草乾莫愁身萬里明日
到長安長沙云長沙十萬戶落日一舟停山勢趨衡
嶽江聲走洞庭投詩悲賈誼把酒弔湘靈春暮懷芳
草啼鵑不可聽

二筆第四卷載廣西灘江於明萬厯時蔡中丞開闢
險灘迄今數百年行旅猶患苦之光緒丁亥制軍張
公檄陳象九大令張逸槎二尹用西洋機器炸藥轟
開險灘較明時之用三角船千觔飛撞五爪龍蜈蚣

鏜諸器事半而功倍矣象九有詩紀之云灘江多險
灘大小三百六蒼梧至桂林步步相聯續地勢如建
瓴舍此無停蓄亂石布縱橫洪波隨起伏羅列若散
星壁立類飛瀑喧闐十里聞鼓角鳴山谷垓下圍項
王昆陽戰文叔劍戟氣森森刀矛光簇簇令人碎肝
膽何止駭心目自昔往來船巘岼不敢觸傾覆僅須
臾舟人歌當哭豈乏有心人無策手自束富平今重
臣救時經濟足鰕生捧檄行謬許情形熟共濟有張

騫鑿空不嫌促摧堅利火攻椎斧易機軸事半而功
信用神乃效速嶮巖去其尤瘡疽攻厥毒訇稜魍魎
驚列缺蛟龍蹙浪花連石飛光燭半天燭河伯助餘
威陽侯早驚服從此慶安瀾一江春水綠

象九詩余已載二筆卷八及三筆卷二矣茲復見示
近稿皆于役離鬱江途中所作佳句如夕陽紅上塔
烟樹綠當門日光寒入暮風味冷千秋曉晴山翠活
日午樹陰圓滄波自惜遠行客明月不來何處簫水

邊野鳥自來去山半白雲時有無數聲杜宇惜春去
一路桐花冒雨開新秧出水綠三尺野竹含烟青一
圍象九畫中有詩固宜詩中有畫也

陳礪莊太守贈銅鼓一質厚約分許權之得四百兩
繫之以工部營造尺高九寸面徑一尺六寸周五尺
腰束減六寸底如其面而空自邊至中央凡十二暈
疏密相間內皆細紋不一其狀有兩乳圍內圍六十
一乳外圍一百四十五乳中央隆起十二脊如葵花

形每脊高不及二分鼓身自上而下凡十六暈暈間
花紋與面同兩傍近上各兩耳左右對出如環用以
舁通體完好不缺不窳按廣西通志銅鼓考銅鼓爲
蠻獠所鑄漢初已有之馬伏波得之以鑄馬式後人
乃謂伏波所製並附會及于諸葛甚誤鼓大小不一
有蟾蜍突起分據四圍者有繪刻十二生肖者溪蠻
賓宴祭享及召集人眾皆用之有鼓者號爲都老初
成時置酒招同類豪富女子以金銀爲大釵叩之去

則以釵遺主人上者可易牛千頭云

樂蓮裳銅鼓歌云我聞賂越貴銅鼓一面價值千牂
牯金銀大釵填滿庭都老豪強勢如虎九壇七獻祭
瓠祖打鬢勸客客酬主木弓鐵鏃牌山弩出尋仇敵
召戎伍此時黃鐵鳴碎鏗缶童跳歌黎女舞銅鼓故
實大略如此

文君亮卿徐君固卿均贈銅鼓大小相似而花紋各
異兩旁有人騎馬形或牧童牽牛形均甚古拙蓋唐

宋以前物也

余道經合浦之六硯墟及博白之六鳳墟廟中皆有銅鼓高廣倍於余所得蝦蟆分踞四圍憶昔年于役西甯亦見大銅鼓一蓋兩廣多搖撞之境時時出於土中然近年搜採已罕有而價昂矣

前卷言梧州產鱔魚魴魚頗鮮美今歲鱔魚尤多按鱔魚兩粵雖常有之然究以吾鄉揚子江中爲最佳前明卽已入貢何景明詩云五月鱔魚已至燕荔支

盧橘未應先賜鮮徧及中璫第薦熟欣開寢廟筵白
日風塵馳驛騎炎天冰雪護江船銀鱗細骨堪憐汝
玉筋金盤敢望傳至我 朝康熙年山東按察司參
議張能鱗疏請免貢疏曰爲欽奉 上諭事康熙廿

二年三月初二日接奉部文安設塘撥飛遞鮮恭
進 上御值臣代攝驛篆敢不殫心料理隨於初四
日星馳蒙陰沂水等處挑選健馬準備飛遞伏思

皇上勞心焦慮廓清中外正當飲食宴樂頤養天和

一鰯之味何關輕重臣竊以爲鰯非難供而鰯之性難供鰯字從時惟四月則有交時則無諸魚水養則生此魚出網卽息他魚生息可餐此魚味變極惡因藜藿貧民肉食艱難傳爲異味若 天廚珍饈滋味

萬品何取一魚竊計鰯產於江南之揚子江達於京師計程二千五百餘里進 貢之員每三十里一塘豎立旗竿日則懸旌夜則懸燈通計備馬三千餘匹役夫數千人東省山路崎嶇臣見州縣各官督率人

夫運木治橋剗石治路晝夜奔忙惟恐一時馬蹶致
干重譴且天氣炎熱鱗性不能久延正孔子所謂魚
餒不食之時也伏念 皇上聖德如天豈肯以口腹
之故罪責臣民而臣下奉法惟謹故一聞鱗魚進

貢凡此二三千里地當孔道之官民實有晝夜不安
者臣以疏遠外吏何敢冒瀆 聖聰惟伏讀律令百

官技藝之人應有可言之事亦許 奏聞況臣一介

庸愚荷蒙 聖恩官至叅議目睹三省官民祇爲膳

饑一物驚惶勞疲官廢職事民廢耕耘若不據實敷
陳不忠之罪何以自追故敢冒昧越陳伏乞 皇上
如天之仁下 詔停止不但傳之史冊流芳千古而
三省之官民數千之役夫咸祝 聖壽於無疆矣疏
上奉 旨永免進供欽此既憶鄉味復念 皇仁因
備錄之

前卷載梧州產狗魚四足嘗擬賦詩紀之近閱俞蔭
甫太史集有鰕魚詩在安徽新安所作蓋魚有四足

其名不一不獨秦蜀有之詩序云鰕魚生山澗中有
四足能緣木食鳥雀不水可活余考爾雅鰕大者謂
之鰕郭璞注曰鰕魚似鮎四足聲似小兒啼海外西
經曰龍魚陵居一曰鰕一曰鰕魚又北山經曰決決
之水多人魚其狀如鯢魚四足其音如嬰兒食之無
癡疾蓋卽此魚之類史記司馬相如傳禹禹鯪鰕徐
廣曰鰕一作鰕漢書正作鰕注引郭璞曰鰕鰕魚也
似鮎有四足聲似嬰兒然則鰕也鰕也皆其異名也

寓齋前有畜此者因而賦之詩曰水蟲謂之魚宜水
不宜陸造物喜出奇不許深淵伏是故鯢與魴其足
各有六鱣魚則虎爪鰈魚則雞足乃歎物類繁莫恃
爾雅熟怪哉庭除間何處得此族有足竟如鮎無鱗
又非鰻夜靜聞其啼聲類小兒哭云白山澗生飢極
輒緣木巧借口中水靜待鳥來啄鳥渴就之飲誰料
入其腹書生喜臆斷謂此乃鯢屬又或謂之鰓上林
賦曾讀又或謂之魴異字史公錄一笑語主人魚乃

我所欲何不烹爲鯖否則乾爲鱸使我得染指當勝
雞與鶩旣而復自笑吾意殊碌碌海上有鯨鯢京觀
未及築矧此池沼物區區安足戮不如姑置之仍命
校人畜

丁亥六月初四日 家君七十有七壽辰戚友以文
祝者散文以袁渭漁孝廉爲最駢文以陳孝蘭孝廉
爲最均長篇不備錄以詩祝者佳句如汪君芙生云
抱朴子方游粵嶠武夷君已見曾孫生較荷花先廿

日身同椿樹閱千齡羊辛楣太守云龐公隱德傳荆
峴仲武詩名動吹臺黃葉滿牀編著述青山岸幘賦
歸來嵩嶽白雲千仞峻湘江明月一天秋

嘗游
豫楚
耆舊

早分江表席詞人側作嶺南仙孝友門庭推石奮文
章豪傑比元之凌仲璫刺史成五律十首錄六首於
此其一云耆宿東吳長南華九老行儒宗齊祭酒人
仰魯靈光炎海新詩卷澄江舊草堂霞觴稱子舍愛
日正舒長其二云少小知名早從親萬里游德星聚

江左泥雪又中州高詠梁園月清談鄴下秋紀羣交
競納裙屐足風流其三云憂患中年感高懷絕俗紛
紅羊消浩劫蒼狗幻浮雲大度婁師德間情宗少文
君家有麟閣吟賞策奇勛其五云舊事湖湘紀長歌
行路難艱危曾備歷橫逆笑無端功行神仙具襟懷
天地寬比干陰德盛謠詠徧單寒其七云又振南來
策仙真號地行虎門看海色羶峽聽江聲雲水尋幽
趣樵漁狎舊盟更欣腰腳健嘯咏遍滄瀛其九云四

世同堂聚婆娑樂是翁梨眉登上齒艾髮驗方瞳荔
子紅雲宴蓮花綠水簫登龍集仙侶共吐氣如虹皆
典雅名貴壽詩中不多見也

壽聯佳者辛楣句云洛社方開真率會濟南合寫授
經圖句頗高渾孝蘭句云遙獻碧筍杯喜令子榮親
東閣歡承天錫嘏笑扶綠玉杖羨詩翁訪勝南交游
遍地行仙亦工麗可喜

陽湖趙樹三先生植庭嘉慶戊辰進士官刑部郎中

詩格謹嚴而意致沖淡藁多散佚賸有倚樓吟十餘
首雪後用東坡書北臺壁韻云凍雲吹墮影纖纖蘊
釀隆冬氣轉嚴恰稱臣心清似水本來世味淡於鹽
人圍爐火寒消酒我共梅花笑索檐漫擬明朝看霽
景朔風猶透紙窗尖曉來啼過幾羣鴉牆外時聞滑
滑車不是天公真戲玉如何塵海亂飛花青山冷落
誰爲主白地光明有幾家愧我近來詩興澀清宵不
禁手頻叉

倚樓吟有蘆花詩用查岑華原韻云碧雲飛盡白雲
鋪日日江帆送影孤一夜西風吹老去五更明月照
來無閒鷗夢雨迷簑笠瘦蠅扶杖入畫圖愧我勞薪
殊草草鄉心振觸到蓉湖飄泊人如不繫船篷窗擁
被未成眠舊游葭閣雪三里歸夢蘆溝月一鞭落日
蕭蕭餘故壘驚沙瑟瑟下晴川牽芳漫憶春芽早侵
鬢霜華又幾年花開花落自紛紛水色花光兩不分
涼鷺立殘千頃雪斷鴻棲冷一溪雲白蘋江上如招

隱紅蓼洲邊合伴君
葦港有人呼欲出
尙餘劍氣倚斜曛
綠水紅蓮景物非
暝烟如織鎖苔磯
不曾作絮原宜冷
未到沾泥尙欲飛
商女離弦知有怨
老漁釣艇慣相依
他時若遂蒹蘆願
澤畔行吟一草衣
又和前韻四首云
沙頭渚尾幾層鋪
半掩荒洲客棹孤
思婦琵琶煩絮否
老漁絲鬢試簪無
經年風露成秋色
終古江山此畫圖
頓觸蒹蘆歸興去
者番清夢落平湖
峭帆日夕駛行船
只有閒鷗自在眠
霜岸雁聲柔

客櫓雪橋驢背冷吟鞭吹殘暝色烟橫塞邊起秋痕
月滿川漫與眾芳消歇盡獨留素質送流年點點繁
華過眼紛飄零蹤跡柳棉分萬花園處明紅葉一水
中央裏白雲涼草塵緣應笑我勞薪日積豈輸君羨
他漁隱清閒甚不繫扁舟對落暉短筇長芽景已非
一枝枝傍釣魚磯瘦原有骨看孤立熱不因人肯亂
飛除却青萍誰許伴未妨玉樹暫相依此中自是多
奇土何事棲遲尙草衣

樹三先生之孫鶴皋茂才詩已摘錄第五卷其配呂
采芝女史壽華有幽竹齋詩及秋筵詞一卷柏舟早
賦率多悽楚之音呂曼叔觀察其同懷弟也爲梓行
之詩有云欲慰君子心暫緩泉臺赴上有黃髮親代
君伸烏哺螟蛉待有人代君深保護苦志貞操直攄
胸臆咏菊云不與春花並幽然獨自芳無言人共淡
有節晚能香此則托物自喻如夢令送春云報道一
聲春去滿日游絲飛絮囑付燕和鶯可否留春暫住

無緒無緒怕聽妬花風雨蝶戀花春暮憶妹云寂寞
重簾庭院悄門掩梨花燕子歸來早寒食清明都過
了池塘又見荷錢小極目荒烟迷古道冀北江南
夢逐征鴻渺盼得魚書偏草草近來肥瘦誰知曉又
高陽臺云芳草無情依然綠遍池塘蝶戀花云望遍
天涯飛絮渾無準均有清婉之致

毘陵閨秀瓣香秋水者爲多伍蘭儀女史爲仲常觀
察女弟酷嗜莊盤珠詩詞有綠蔭山房詞稿壺中天

送春云簾前鳥語正景色融和乍晴天氣柳綠桃殘
春已暮惆悵人生如寄匣裏珠璣囊中錦繡一旦皆
捐棄浮雲過盡塵緣迴想無味堪歎粉蝶尋香游
蜂釀蜜也被韶光餌轉瞬落紅花滿地猶是相偎相
倚萬種淒涼千般懊惱終日如沈醉無情風雨韶光
一霎更易蓋女史歸陸雁峰司馬殉庚申之難故所
作詩詞類多悽惻云

陸惕身孝廉爾昭同客西江別十餘年矣近在汪柳

門學使幕中始與握晤出示珍抱齋詩鈔大風雨度
黃河云歲歲爲羈客蒼茫涕泗橫河聲千丈落風力
一篙爭久役情逾怯長貧命亦輕伊人湘水曲回首

感平生

謂張堃
秋學使

春日云寂寂閒齋引夢長珠簾未捲

惜流光無端風雨春寒甚遲我幽蘭十日香古詩亦
多佳者篇長不備錄

惕身蘇臺懷古云不使屬鏤輕一決錦帆終護采蓮
人與隨園若使姚崇還作相君王如子共長生句同

一用意

太白樓舊有楹聯云我輩此間惟飲酒先生在上莫
題詩惕身任城太白樓詩頌聯云公去更誰能飲酒
我來隨眾也題詩就楹聯語翻用之亦灑落可喜

惕身復出示其尊人秋巖先生崇蘭所著夢梨山房
賸藁僅存數十首蓋經亂散失惕身記憶存之課子
圖爲洪太守題云城上烏尾畢逋母課子烏哺雛烏
甯倦雛則飛母甯飢子則肥機杼弄千匝縷縷都成

血空山破屋中鬼亦爲之泣
簷風刮燈燈一粟明月
不來鼠嚙足母勤織兮兒勤讀
五更驚起林烏宿卽
今彤史已垂名指點白雲深
復深乞留萬古春暉駐
稍慰區區寸草心之江留別
同人云十年消盡馬蹄
塵自笑虞翻骨相屯未必竟
無天下士不知誰是眼
中人秋江蝦菜情殊戀春市
鶯花夢怕真滿地荆榛
豺虎卧茫茫何處著吟身
刳灰飛盡冷滄桑衮衮科
名礧礧場竟把焦頭爲上客
空將鬢尾哭中郎東陽

瘦損惟留骨北海沈酣別有腸一卷曇花比香草淡粧濃抹費平章斷句如夜月瓊簫曾度曲秋雲羅帕爲題詩繡佛閒情都懶散遊仙小夢待溫存華年似水愁難浣好夢如花散亦癡皆可誦也

徐植之太守瑋文潛心經學手披筆錄者積數十年近出其說詩解頤二卷見示蓋昔館於子惠將軍紫蕙園時所成近將軍官成都先爲付梓者也余最愛其說凱風之詩云既有七子且知慰母心計其年不

應去矣若云美孝子子美未著而母過先彰亦非作詩者忠厚之意當是向姜不安其室之類七子前母所生也欲去非欲嫁也若牽淫風說詩孟子亦不云小過矣化後母爲仁慈此其所以可歌可誦也

管絃若先生韞山堂文有凱風說云凱風爲孝子之詩親過之說出於孟子然謂之過小度不過年老之人喜怒失節虐使其子而已其子深自咎責惟媿己之不能悅母而絕無怨懟之心聖人列之於經以敎

孝也若如序傳所云母生七子而其子又皆能賦詩
母之齒亦長矣必無不安其室之理萬一有之乃是
人類之不祥家庭之大變安得謂之小過孝子有不
垂涕泣而諫之哉漢章帝賜東平琅琊二王詔云今
送光烈皇后假紵帛巾各一及衣一篋可時奉贍以
慰凱風寒泉之思章帝之於經深矣其引義必不當
若是失倫可見東京以前爲毛詩者必不如序說所
云而小序之爲衛宏增竄無疑也噫以七子之孝而

使其母蒙不安其室之惡名則衛宏之罪大矣

二筆卷一載劉子迎觀察卽事詩同治十二年所作也維時莊心吉部郎同作四首其嗣君秉文庶常鍾濟游粵抄以見示且云遺詩僅此請彙錄之詩云東南琛賫盡梯航 觀闕重開輦路長舊事烽烟已消歇新謨樸斲共褒揚定都天保周申旦構殿長安漢未央末議罔知參 廟策靈臺仁澤本加傷千門萬戶輩盤螭佳氣蓬萊已積時營室跨躔應抵闕昆明

象漢卽穿池奉常昔拜刪儒說將作今除尙巧思瓦
礫黃金方等價算緡百億計銖錙刼餘廢苑啟荒蕪
儼並先朝璫葉鋤玉盃悶陵無寢役金閭奏御有馳
書材艱杞梓徵巴郡氛熾欃槍落井墟復覩上林

森宿衛梯霄架極竦皇居三山瀛海接神州棟宇

嶽岑結綺樓暑刻雞籌司永夜符章龜紐領長秋竹
梧朝實鸞鳳集榛莽宵空麋鹿遊景象中興會全

盛翠華頻幸肅郊椒

閩劉子諶太守出示其師鄭仲廉主政守廉不螭道人詩詞稿詞宗法蘇辛較多于詩公獨愛其春草七律爲錄二首云風搖征轡暝如薰南浦離心指碧雲遠道所思偏入夢天涯何處可忘君鶯聲茂苑人千里柳色瀛州月二分記自曲欄橋上別含情未忍見羅裙生成顏色碧芊芊藉汝何妨一醉眠世事榮枯眞轉眼天涯離別又經年萋萋斷岸空流水漠漠平蕪欲化烟并與王孫繫歸思柳風杏雨困人天他如

歸燕樓臺初易主飛花院落不開門泥我離懷偏夕
照伴人愁緒易黃昏皆不脫不粘綽有神韻